












ОЛЬГА ПАНКОВА

РАСТАСАДО ДЖИИБЭН



ГОСЛИТИЗДАТ — 1936



ОЛЬГА ПАНКОВА

РОСТАСАДО ДЖИИБЭН

ПОЭМА



ГОСУДАРСТВЕННОЕ ИЗДАТЕЛЬСТВО
«ХУДОЖЕСТВЕННАЯ ЛИТЕРАТУРА»
МОСКВА 1936

197

Автор просто и ярко дает картину
бесправия и рабского положения
цыганки-женщины в кочевьи.

1

Э Пэталоствэ чяёри,
Сыр дрэ чекат чэргэнори
Сы екх, сыр якх раххэла ла.
Тэ сыр тэ на раххэс Каля.

Коли адай сарэ ромэндэ
Машкир сарэ тэрнэ чяендэ
Вавря нанэ э гожона,
Сыр Пэталоскирэ э чя.

Сыр рат калы якха э чятэ,
Жыко кустык чюрья Калятэ.
И статно пэса, и учи,
Сыр тэрны брэзыца стходы.

Пхутёла ласа дад пхуро.
Учес лыджяла ёв шэро.
И выкэдэла джямутрэс
Машкир чявэндэ ёв муршэс.

Бут задыкхэнапэ чявэ
Прэ гожонатэ, и пхурэ
Радаса лэнас бы Каля
Дрэ пэскри семья сыр борья.

Нэ ди дья ёй дрэ екхэстэ,
Дрэ Марюхакирэ чявэстэ.
Дрэван камэл тэрны чый лэс,
Нэ на камэл дад чёрорэс.

А коли дадо на камэла,
Мэк ёв фэдыр и на джинэла,
Мэк екх э рат калы дыкхэла,
Сыр о чяво чя чямудэла.

II

Рупэса луго зачидо,
Э болыбнастыр чён тэрно
Чивэла свэто, а пашыл
Саро суто, саро сы штыл.

Бэшлэ голумбицы про брэго.
Тэло гэра суты сы рэка,
А брэзы сбандёви тэлэ,
Лэн пологоса закэрдэ.

О вэшоро лэн гаравэла,
Балвалори пашыл кхэлэла,
И рэкица гилы багала,
И чён дыкхи прэ лэндэ сала.

Чявэстэ бар сы про ило:
Дрэван камэл Каля Учё,
Нэ лэстэ шатра рискирды
И э сэмэнца чёрори.

Ёв атася шундя ромэндыр,
Со дур э барвалэ шатрэндыр
Ко ром Пэтало дро курко
Явэла свато барвало.

Ило чявэс на хохавэла,
Джинэл, со чяй лэс на камэла,
Нэ и джинэл ёв одова,
Со на пхучела дад Каля:

— Нэ со жэ ту, мри бахтори,
Пхэн, ту явэса ли мири?
Иль ту ваврэскири явэса?
Нэ со жэ ту на ракирэса?

— Пириачьян ман тэ камэс!
• — Нэ пхэн жэ мангэ, пхэн конэс
Выкэдыя тыро ило?
Пхэн кон ёв? Кон тыро камло?

Нэ со жэ ту уса ровэса?
Ясвэнца рэндо на кэрэса.
Фэдыр роспхэн, со про ило.
Со захая тыро шэро?

Мэ никонэс на подарава.
Дро сваты атася ж явава.
А на отдэла дад тыро,
Нашаса туса, и саро.

И газдыя шэро. Якха
Сыр чергэня, и дро ясва
О муй саро. Ясва тхадэна,
Тэ ракирэн ёнэ на дэна.

— Палсо адыкэ ракирэса?
Ило лавэнца рискирэса.
Джинэс, ту, кон миро камло.
Кэ кон рискирлапэ ило.

Нэ окэ дад! О дад миро
Хаськирла мро кало шэро.
Джинэс ёв со задуминдя? --
Ясва пиримардэ лава.

Пыя прэ чяр, и сыр мулы,
Попарныя и шылалы.
И долгэс ёй пропасия,
Коли дрэ пэстэ загыя.

О чён тэрно криг угыя.
И болыбэ попарныя,
Коли дрэ шатрица парны
Авья э гожо амари.

III

На сала кхам совнакуно.
О болыбэ сы холямо.
Рувэса тёмно вэш дыкхэла.
Ясвин, ясвин пиритрадэла.

Э парубнастыр дад авья
И чякэ холямэс пхэндя:
— Ту подурипэ дадывэс.
Явэна о рома. Шунэс?

Нэ со ровэса, дылыны?
Ту на джинэса бахт сави
Дэвэл амэнгэ бичадя, —
И о Пэтало ковляя.

И закхэлдэ прэ чиб лава.
— Джинэс, мри чяй, савэ рома?
Эх, тэ латхав три бахтори!
Явэса ту бари раны.

Тагарья, а нанэ рома!
Славутна. Мэ гара, гара
Шундём пал лэнгро муршыпэ.
Барэ кофарья сы ёнэ.

Э грэн традэна табунэнца
Эх, тэ латхав мри бахт гэнштэнца.
Издрала пхув тэло гэра.
Нэ со тэ ракирэс — Мурша!

Явэна сваты э дрэвцаса.
Отдава тут барэ честяса.
И пьаса ж! Пьаса дуй куркэ
Пал гожыма и муршыпэ! —

Екхатыр муй э Пэталостэ
Ачья сыр холямэ зверёстэ.
Захачинэ якха ягаса.
Прэ чятэ ёв здыкхья холяса.

— Лаче лава дур на уджяна,
А дылынэ дурал прастана.
Шундём, со ту калэ ратенца
Са шляинэсапэ чявэнца.

Тимин ту пэскэ на джинэса.
Ту прэ конэстэ задыкхэса?
Пхурэ дадэс на тангинэса,
Парнэ чёра ладжякирэса.

Нэ тэ ракхэл тут о дэвэл!
Соб бэнг ада. Учес тэ лэл!!!
Злыдняс латхьян. Дыкхэс конэс?
Ростасавава сыр сапэс! —

Про васт э чюр закрэнцындя.
Э Калы годл^а задья:
— Нэ со ж ту, дадушко, кэрэса?
Палсо ту ман? Палсо марэса?

Нэ на шундя дад годлыпэ.
Дрэ лэстэ о бэнга дынэ.
Чюпны дро васт заухтылдя.
Пиро думо чюпны тья.

Ромня прастана тэ дыкхэн:
— Дыкхэн, ромнялинькэ, дыкхэн!
— А со кэрдяпэ пхуромэса?
— Конэса марлапэ? Конэса?

— Тэ никонэса. Марла чя.
— Конэс? Конэс? Тэ э Каля.
— А со адасаво кэрдяпэ?
— Джинэс чявэс э Марюхатэ?

— Нэ окэ лэса. Ту чячэ?
Тю-ю!!! Тэ пхадёл миро шэро.
Мишто! Дад чюжонэн дыкхэлас.
— Уса страминэс тэ кошэлас.

— Ромалэ! Подарэн дэвлэстыр!
Отлэн э чя ада ромэстыр.
Ёв зачингирила чёрорья, —
Ромнендыр кон-то пропхэндя.

— О ди аври ада чяендыр! —
Загодल्या кон-то ромэндыр.
— Мишто! И мол ёй адава.
Мэ хал ёв лакирэ маса! —

И екх по екх криг э шатратыр.
Одой визготыма чюпнятыр.

Пора, пора шарандунендыр.
А со ачелапэ рэбрэндыр?

IV

Бельвель прэ фэлдыца змэкьяпэ.
Упрэ чергэн захачияпэ.
Розлыджинэ яга рома.
Одой, адай шундлэ гиля.

Дрэ шатра ко пхуро Пэтало
Бэшлэ рома, ромня. Урняла
Гилы чяенгирэ уштэндыр.
Стонинэ фэлдыца гилендыр.

Бэшлэ рома ваврэ шатритка,
Сыр уса екх савэ форитка.
Чяй тэ дыкхэл прэ лэндэ дарла.
Пэтало лэн сватэнца кхарла.

Шукар рома подвыпинэ.
Якха сарэндэ дылынэ.
Шэро крэнцынэ бравинтатыр.
Кудуни дро ка́на годлатыр.

Залыджинэ э кхэлыбнытко.
Устя Пэтало — муй кхамитко.
И пало васт э чя газдэла.
А одоя, дрэ пхув дыкхэла.

— Ушты мри чяй, джа кхэл амэнгэ.
И тихэс кокоро сватэнгэ:
— Дыкхэн, Ромалэ! Чяй мири.
Нанэ-ль чячэ? — бари раны.

Сарэ якха, сарэ прэ латэ.
Захачия о муй Калятэ.
Фэдыр бы тэло пхув пропэрлас,
Фэдыр бы ёй екхатыр мэрлас.

Нэ со ж, со лихо тэ кхэлэл.
Ёй дарла лав тэ пропхэнэл.
Дад ла сватэнгэ сыкавэла.
Сыр лачэ грэс ёв ла бикнэла.

Саво кэ ёй дадэскэ рэндо.
— Ушты мри чяй, джя, кхэл амэнгэ.
Камэл ёв ла тэ сыкавэл.
Бутыр ничи ёв на камэл.

И кхэлла ёй, псикэнца марла,
Уж никонэстыр ёй на дарла.
И на ромэнгэ, на дадэскэ,—
Ёй кхэлла акана ваш пэскэ.

Устя жэнихо — набаро
И сыр ришота муй бугло.
Екх якх банги ада чявэстэ.
И мина дылыны прэ лэстэ.

Тырах сборэнца уриды.
Поддёвка синё тхануны.
Упрал симири рупово.
Мэнятыр гад дыкхно лоло.

Тэрдо, якха на злэла чятыр,
На отрискирлапэ Калятыр.
Выгаздыя васта крjúкэнца,
Пиро чянга ёв пэс вастэнца,

Гыя тэ кхэл. Чяя багана.
И почёрьял ромэндыр сана,

Дыкхи прэ грубонэ чявэстэ:
О кхэлыбэ дылыно лэстэ.

Пэтало ушт придандырдя.
Ада сабэ ёв галыя.
Штэтостыр о пхуро устя
И пашыл чятэ тэрдья.

— Дэн тэ скхэлав и мангэ чяса.
Дэн тэ проджявпэ э Каляса,
Тэ встринскирав пхурэ кокалы.
Нэ, фэдыдыр баган, чяялэ!
Нэ акана дыкхэн, ромалэ,
Сыр кхэлла о пхуро Пэтало.

— Коли кхэлдём — на рипирава.
Нэ ваш сватэнгэ мэ скхэлава —.
Гыя стариннэс дыкхлорэса
И пашварэса, пашварэса

Паш чятэ сыр башно ухтэла.
Гэрой на кхэлла, а чинэла.
Кхэлдя Пэтало зоралэс.
Кхэлдя стариннэс, муршканэс.

Шукар кхэлдя Пэтало чяса!
Жэнихо сыс тэрдо корчяса.
И о тэрнэ, и о пхурэ
Сарэ, сарэ пирикхэлдэ.

Про болыбэ уж мурдынэ
О чергэня совнакунэ.
Про гав башнэ пробагандлэ,
Коли о сваты угыне.
Пэтало лэн пролыджия,—
И о дывэс попарныя.

Коли э беда задыкхэла
 Дрэ шатра. Ёй инкэ явэла.
 Насвалыя о дад Учестэ
 И мурдыя о цыпо лэстэ.

Побикиндлэ шарандуня.
 Дай скэдыя бэдэ гаспря.
 Лыя Учё савари пэса,—
 Гыя пэзал барэ дромэса.

Прэ атася исыс курко,
 А жыко тарго дром длэнго.
 Фэлдаса ёв дывэс гыя,
 Дро вэш лэс рат заухтылда.

Рат осенитко сыс калы.
 Рат бришындытко шылалы.
 Учё дрэван замразыя
 И бришындэстыр киндыя.

Тэ джяс ратяса дарано,
 Тэ и о дром нанэ джиндло.
 И дурыдыр ёв на гыя—
 Дро вэш Учё заратькирдя.

Ёв скэдыя шукэ кашта.
 Э ягори розлыджия.
 Бэшло кэ яг Учё — татёла,
 А тёмно рат уса калёла.

А о бришынд уса чивэла,
 Тэрнэ чывэс на тангинэла.
 Капинэ о паны упрэстыр,—
 Кинды сы пхув э бришындэстыр.

О гад саро киндо Учестэ,
Тырах сари кинды, и лэстэ
О данд про данд на поперэла.
Ёв мразыя, тэ хал камэла.

Бэдэ маро, савэ лыя,
Панэстыр сыр кхурми ачъя.
Мыя тэ хал мро чёро.
Нэ со жэ тэ кэрэс Учё!

Кэрдя ёв яг побарыдыр.
Ягатыр про ило фэдыр.
Понабут ёв обшутя
И прэ колын шэро пыя.

Суно потихэс подгыя
И дро якха лэс чямудя.
Тэлэ о цымблы обмэклэпэ.
Якха чявэстэ закэрдэпэ.

И со ж: дывэс кхамэса сала.
Паш шатри э гилы урняла.
Калы сыр цвэто уриды.
И ко урдэн сы ёй тэрды.

Шэро Калятэ сы пхандло.
Муй э тэрнятэ бахтало.
Сыр чергэня якха хачёна
И сыр мути данда парнёна.

А ёв — Учё, лыджяла грэс
Э дро пхаба, э сывонэс.
Гэнштос кэ шатра подьянэла.
Грай дро поводыцо кхэлэла.

Э сывонэс ёв спэнтындя,
Прэ чяр Учё гэнштос мэкья.

Адай Калы лэс подкхардя
И со-то тэ пхэнэл камья.

Екхатыр громо сыр дья.
О болыбэ покалаыя.
Э яг упрэ заблэстиндя
И дарано адай ачья.

Адя балвал закренцындя
И пирэ фэлда зарундя.
И сыр бы ей барэ холятыр,
Э шатра зрискирдя пхувьятыр.

И лыджия, и лыджия
Пир фэлда. И уса руня^и
И кренцындя саро дромэса,
А болыбэ э бришындэса
Сыр төвэрэса чингирдя.
И яг упрэ са блэстиндя.

Адай о громо зорало
Сыр роздыяпэ. И саро
Со сыс тэрдо ангил якха
Екхатыр сыго хасия.

Нанэ Каля, гэнштос нанэ,
Са екх сыр тэло пхув пынэ.
Адай сухтя Учэ пхувьятыр,
И на полэла ёв страхатыр.

Кай ёв? И со кэрдяпэ лэса.
О болыбэ ачья парнэса,
И о бришынд пириачья.
Э пхув калы обшутя.

А ёв дро вэш. Нэ кай Калы?
Кай сыво? Кай тэрны ромны!?

И полыя адай тэрно,
Со адава исыс суно.

Подуминдя ёв эменькаса
«А со — то нашукар Каляса.»
Ило дукхатыр стасадя.
И дро шэро адай пыя:

Со бидыца инкэ явэла.
Инкэ дрэ шатра задыкхэла.
Нэ о дывэс гара парно.
И дурыдыр гыя тэрно.

Вэшэстыр сыг выкэдыяпэ.
Тэ и ко тарго подыяпэ.
Одой о мануша пхэрдо —
О тарго дро курко баро.

Издрала пхув калы гэнштэндыр.
Э годла джяла манушэндыр.
Рома-кофарья парувэна,
Чюпня пир грэндэ гулинэна.

Пиро васта, васта марэна.
Полатыр пхурдынэн одэна.
Латхья э грасторэс Учэ —
Грай набаринько, нэ тэрно.
Заплэскирдя ёв дуй парнэ
И традыя цыпос кхэрэ.

Тэ хал дрэван камэл чяво,
А дрэ кисык сы паш састо.
И бахтало, со грэс киндя,
Ёв дро трактиро загыя.

А грасторэс пашыл пхандя.
Одой тэрдэ сы бут грая.

О хулая драб гэнсто пьёна,
А грэн дрэ фэнштра придыкхэна.

Учё дрэ штуба загыя.
Одой тэрдэ бут скаминда.
Пал лэндэ мануша бэшлэ.
Кон хала, пьела. Кон ловэ
Адай жэ про скаминд гинэла,
Пачкэнца дрэ кисык чювэла.
Учё дро вэнглыцо бэстя —
Хабэ ёв пэскэ запхэндя.

И только ёв тэ хал лыя,
Екхатыр годла ушундя.
Аври баро сыс годлыпэн.
И роибэн и кошыбэн.

Хабэ Учё забистырдя,
Сыр пиро кан лэс кон дыя.
Ёв выпрастандыя кхамло.
И сож, дыкхэла: грасторо
Сы отпхандло, и гаджёро
Паш лэстэ тыкнинько тэрдо.
Дыкхно екхатыр сы гавитко
И пашыл лэстэ о кагнитко.

Ваврэ стронатыр э гаджи
Муй порада ёй холямы
Уинэ дро саро кирло.
Ясвэндыр муй саро шувло.

Ило страхатыр замардяпэ,—
Ко грасторо Учё дыяпэ.
Кагнитко васт розлыджия
И пиро муй чавэс дыя.

— Нэ, романо о муй тыро!
Нэ, джюклано тро мас кало!
Дро баро кхэр скирнякирава!
Тэрдэв! М^у тукэ сыкавава!

Чиндя ёв пиро кан Учес,
Змардя гэрэд^иыр чёро^ирэс.
Пир пашварэ тэ дэл лыя
И уса датыр лэс косгя.

Гадже тэрдэ. Сыр ангрустяса
Обухтылдэ — на упростаса.
Муя сарэндэ холямэ.
Дыкхэна выкхардэс ёнэ.

А кон подсала, кон сы штыл,
Кон протырдэла васт ангил.
Пиро шэро иль муй чинэла.
Кон прэ чявэстэ чюнгардэла.

Мардэ жык одова чявэс,
Коли уж лэс про паш джидэс
Калэ пхувьятыр газдынэ.
И дро чяро отлыджинэ.

Одой тыкно ракирибэ —
Дрэ шылалы лэс чюрдынэ.
И про бара, саро дро рат
Ёв чёро^иро пашло със рат.

А дывэсэ дуй хэладэ
Ко барыдыр лэс лыджинэ.
О грубо муй лэс допучья,
Катыр ёв грасторэс лыя.

На фрэнтындя чяво лавэса,
Нэ грубо рисия сапэса.

Нисыр лава на прилыя,
Со грасгорэс о ром киндя.

Ёв ракирдя, со грай чёрдо,
Со дрэ дава Учэ банго
И пал адасави холы
Ёв лэс страдэла прэ бари.

Дро васт бари э зор Учестэ,
А э холы прэ грубонэстэ.
Сы барыдыр ада зорьятыр,
Хачёла о ило холятыр.

На зрикирдя адай ром пэс.
Дрэван мардя ёв э гаджес
И тэло стрэга атася
Тходэ Учес про дэш бэрша.

VI

Дро шатри бьяв рома кхэлдэ —
Чя пал «муршэстэ» выдынэ.
Сханэ Калякиро шэро.
А кон? Уса о дад пхуро.

Пэтало фрэнто пхурором
Отдэла чя ёв пало ром.
Выкэдья э джямутрэс
И барвалэс и зоралэс.

На кя камэна о рома
Э Пэталос палодава,
Со пхутькирдо сы о пхуро,
Со чиб длэнги, и холямо.

Нэ атася ёй э сватэнца
Уджяла кэ нэви сэмэнца.
Калы явэла уж тэрны —
Калупаёскири ромны.

Ададывэс инкэ ромэнца
Ёв пэскирэнца — цыпарэнца
Бравинта пьела сыр паны.
Багала пхураны гилы.

Бут и бравинта, и хабэ.
Рома гара поматынэ.
Гара уж э годы тырдэна —
О муршыпэ досыкавэна.

Уж екхвар сыс и марибэ:
Мардэпэ дуй рома тэрнэ.
Заспориндлэ кон муршыдыр,
Пир тарго лэндыр кон фэдыр.

И екх ваврэскэ «муршыпнаса»
Пропхарадя шэро душляса.
Нэ адава ничи инкэ.
А кай адай сы о тэрнэ?

Бэшлэ — Калы пашыл чявэстэ.
Паш одолэстэ корорэстэ,
Саво, коли ла сватындя
Сабныткэс тэ кхэлэл гыя.

Нэ акана ёв лакэ ром.
Ла отдыя дад пало ром.
И Колупаи акана
Сарэ прэ латэ хулая.

А сёмьнца одой бари:
Явэла трито ёй бори.

Састро, сасуй джидэ инкэ
Дуй би ромненгиро чявэ.

Трин о чяя инкэ кхэрэ.
Тэ э борьендэ чяворэ:
Екхатэ дуй ужэ барэ,
А э ваврятэ панджджинэ.

Тэ екх екхэстыр тыкныдыр
О чяворэ, нэ сыр гирил.
Инкэ адай про дывэса
И шовтонэс ромны яндя.

Бари то семья — мэк бари.
Тэ уж ракирна холямы
Дрэван сасуй, а о чяя
Хачита чячюнэ сапа.

Нэ попыя жэ чяёри!
Эх, хасия ёй чёрори!
Захана лакиро шэро.
Спхагирна джиибэн тэрно.

Нэ тэ явэл о ром камло
Дивья б и джиибэн кало.
Мэк меньшекица барэ семьятыр,
Мэк кошыбэн пхурэ сасятыр.

Камэл ли ёй хоть набут лэс?
Калупаёскирэ чявэс.
На! Коли лэскро муй дыкхэла:
Екхатыр чядыпэ ла лэла.

Ёй на камэл лэс сыр сапэс
Ада славутнонэ муршэс.
Нэ сыр жэ вэко тэ дживэс
Коль манушэс ту на камэс?

А коль ромэстыр тэ уджяс?
Карик? Карик тэ упрастас?
Тэ ёв жэ злэла о шэро
Ёв акана хулай тыро.

Тэ умарэс тэрно ило
И тэ дживэс сыр кашт муло.
Мири гилы пробагандлы, —
Думинэ чёрори Калы.

Нэ сож адасаво Учё?
Ёв салапэ? Галёв чячэ
Думинэ, со э корорэс
Камам фэдыр мэ соса лэс.

Дро саро свэто никонэс
Ёй на камэла. А Учес?
Пал лэстэ о ило дукхала.
Пал лэстэ э годы урняла.

Нэ кай жэ хасия Учё?
Нэ кай кэрдяпэ мро камло?
Курко уж сыр ёв угыя,
Сыр дро паны Учё пыя.

И на джинэл э чяй тэрны,
Со бидыца дрэван бари
Пыя прэ лэскиро шэро,
Со сы чяво закэдыно.

Бэшлы Калы сыр умарды,
Ла на радынэ э гилы.
Якха про свэто на дыкхэна
Ваш со ж гиленца ди тырдэна.

Гилы мамуй кана урняла.
А э Калы и на багала

Хоть и мангэна о рома,
Собы тэрны со збагандя.

А э Калякэ сыкадэла,
Со чиб уж латэ на рисёла.
И дро кирло шуко саро
Тэ на выракир лаворо.

Адай кэ ёй э якх банги:
— Нэ, бага мангэ гилори!
Ту со бэшлы сан сыр мулы?
И на шунаса глос тыри.

И пригыя тэ залыджас,
Вашэ ромэскэ тэ сбагас
И стасадяпэ о ило —
Дрэван кёрдяпэ дукхано.

И окэ ёй забагандя.
О муй инкэ погожыя
Бут менька дро калэ якха.
Илэстыр джяна о лава.

А глос тэрны сыр рупови
Мразякирдя сарэн Калы.
Сарэ илэстыр багандя,
Пало ило гилы лыя.

Ёй багандя ваш одова,
Сыр гожо чён и чергэня.
Сыр свэто лэндыр рупово
Чидяпэ пиро муй кало.

И сыр коли-то чириклэ
Шукар прэ зоря багандлэ.
Сыр кхам совнауно устя
И дро ушта лэн чямудя.

Ваш одова ёй багандя,
Сыр о чяво э чя камья.
Прэ бахт никон на галыя,
Со ёй ваш пэскэ багандя

Ром тэ галёл э сэмэнца
Тэ сханас ла э виндырьенца.
Ром мулякирлас ла екхатыр.
А кошыбэ бы э сасятыр!

Э рат прэ фэлда сы гара,
Гара хачёна о яга.
Бравинта бут рома пинэ,
Лече гиля бут пошундлэ.

Кхэлдэ сарэ чяя тэрнэ
Дыкхи прэ лэндэ и пхурэ
Сарэ мэклэпэ тэ кхэлэн,
Тэрнэ бэрша тэ взрипирэн.

А э Калы сыр наджиды
Паш корорэстэ сыс бэшлы.
Саро якхэнца ёй дыкхья,
А тэ полэл на полыя.

И ушундя сыр дро сунэ
Со грэн уж задынэ андрэ,
Со дад урдэн э миштыпнаса
Потрадыя ангил сасяса.

Бэстя ёй про урдэн ромэса.
Калупаёса корорэса
И чёрорьятэ прэ колын,
Пыя якхэндыр э ясвин.

VII

Ужэ дуй вэсны прогынэ
Сыр чякэ о шэро пхандлэ.
Сыр пало ром ла отдынэ,
Шэро кало сыр заханэ.

Лыджяла мёнька бут Калы.
Вышутя ей чёрори.
Прэ латэ муй нанэ джидо.
Нэ кай жэ гожыма саро?

Кай стать? О муй кай бахтало?
Саво радынэс о ило.
Кай рупово сабэ тыро?
Калы! Кай хасия саро?

О джибэн ла сбандькирдя.
А бут ли ей и проджиндя?
Нэ сыкадёла э Калякэ,
Со бут бэрша джиндя адякэ.

Со николи на сыс ей чяй.
Со и бияндыя адай.
Адякэ лакэ сыкадёла.
Ёй чёрори на присыклёла.

Нисыр кэ семья адая:
Ко ром, ко холямэ пхэня.
И джибэн э корорэса
Ваш лакэ сы пхарэ сунэса.

Ёв нарто сы и холямо,
Со закамья гэрой — саро
Екхатыр трэби тэ кэрэс.
Каля ёв марла зоралэс.

Дрэ семья адая бари
Калы исы тэрны бори.
И э барэнгэ и тыкнэнгэ,
Ёй бутярны адай сарэнгэ.

Явэла ром мато кхэрэ.
— Ту лэс росчив, хабэ подэ!
А коль сыкадыя ромэскэ,
Со на адякэ ёй прэ лэстэ
Вздыкхья. Чюпны дро васт ёв лэла
И про чянга ромня тховэла
И лэла прэ холы уджяла.
Ромнякэ жэ засовлахала,

Собы би лэскирэ лавэндыр
Ёй на уштэлэс э чянгэндыр
Уджяла ёв, и лэс нанэ
И екх, и дуй, и трин мардэ.

Попэрла лакэ и сасятыр.
Ада пхурьятыр — саплынятыр.
Ёй пиро муй борья марэла,
Коль одоя ла на кандэла.

Адай Калы про дывэса
Торбаса пиро гав псирдя.
Тэ набут ёй кхэрэ яндя.
Тэ э сасуй ла захая.

— Дыкхэс, сави раны бари.
Нэ дыкх жэ, пхурэдыр бори,
И набут пиро гав псирдя,
А дыкх, кицы саро яндя!

Ту со жэ думиндян, раняса,
Амэ про стуло тут тхэваса.

Вычюрдэ адава шэрэстыр.
На сан кхэрэ ту-э дадэстэ.

Ту рипир, кон ту сан адай!
Мэ трэ ромэскири сом дай.
Коль на явэла пир миро,
Мэ схава лэскиро шэро.

Нэ мэк явэла ёв кхэрэ!
Порыкирава лэса мэ.
Мэ на джином, со ром дыкхэла,
Со дрэ васта ёв тут на лэла.

Адай сасуй барэ холятыр
Дро муй чюнгардыя Калякэ.
Дро васт о кашт ёй ухтылдя
И дрэ борьятэ чюрдыя.

Нэ окэ ром кхэрэ авья.
Э дай ясва и розмэкья:

— Со ж ту, мро чяворо кэрэса?
Палсо ромнякэ воля дэса?
Ромнякэ екхвар воля дэ —
Ёй и бэшэла уклистэ,
Ёй тут ромэса на гинэла.
Прэ мандэ ёй сыр сап дыкхэла.

И на джиды, и на мулы
Бэшлы пало скаминд Калы.
Ёй дарла лав тэ пропхэнэл
И прэ ромэстэ тэ здыкхэл.

Калупаёс холы лыя
Якх корори зарисия.

О муй кэрдяпэ трашано
И сыр рувэстэ холямо.

— Ту со жэ, дав мэ трэ кирнэс...
И ман на лэса тэ шунэс?
Джюклы! Екхатыр про чянга!
Чямудэ дакирэ гэра!
И сыр дья ла дро думо!
Радя гэраса про трэмо.

Тэл пашварэ мардя гэрэнца
И зоралэс костя лавэнца.
И на дыкхья бибахтало,
Со э Калякэ о шэро.

Пропхарадя ёв тырахаса,
Ёв чингирдя кана чюпняся.
Дрэван мардя о ром Каля.
Ничи холятыр на дыкхья.

И про вавир дывэс муля
Э чяёрья ёй бияндя.
И спасия ёй отэнчя.
И насвалы сыс дуй чёна

И дуй чёна лашыл шэро.
О мулыпэ исыс тэрдо.
Нэ джиибэ упрэ лыя.
Са ж про гэра Калы устя.

Нэ кай! Тэ на галёс ромня.
Насвалыпэ схая Каля.
Сасуй хай састякирлас ла:
Ёй кэравэлас о чярья.

Шэпчинэс со-то дро чяро,
Нэ миштыпэ то сыс тыкно.

Янэнас кэ Калы пхурья
И одоя « састякирдя».

Нэ на яндя о састыпэ
Пхурьенгиро зумаибэ.
Сыр мом тайнэ э Калы.
Ваш лакэ рада нисави.

Нанэ бутыр дро джиибэ,
Коль хасия о састыпэ.
Ваша со пэтькирла кхам тато,
Коль про ило сы шылало?

Ваш со багана чириклэ,
Коль дрэ колын ясва киркэ.
Ваш со про свѣто тэ дживэс?
Коль джяла джиибэн кирнэс.

Коли пал джиибэн саро
На ушунэса лав тато.
Ваш со э менька тэ тырдэс?
Тэ чюпны пэс тэ тховэс?

Тэ э ромэстыр чѣрьалэс
Ясва баяса тэ кхосэс.
Галѣв фѣдыр уж тэ мэрэс.
Ваш со ило тэ мэнчинэс?

Адыкэ думиндя Калы.
Дрэван ёй сыс уж насвалы.
Кокалы о бришынд шунэна
И сыр пхурьятэ ноинэна.

Сыр бар колын притасавэла.
Думо дукхатыр на шунэла.
Якха Калятэ пропынэ.
Дрэ лэндэ яг бутыр нанэ.

Э глос сави-то кашуки.
Ракирна латэ сы шуки.
Пашлы и глос на ушунэса.
Кашлинэ чётори ратэса.

Коли уштэла про гёра,
Балвал попхурдэ — и пыя.

VIII

Сыс вэсна. О дывэс тато.
Саро кхамэса зачидо.
Саро радыныпэ вэснакэ.
А фэлда — гожо индырака.

Шуминэ вэшоро тэрно.
А лэс нежынэ кхам тато.
Кхам джиибэн сарэскэ дэла.
Нэ сож Каля ёв на зракхэла.

Пашлы дрэ шатра сы Калы.
Никон паш латэ — екхджины.
И на галёса, со джиды.
Пашлы сыр уса екх мулы.

Шэро, нэ сыр чириклорэстэ
Вышутія. И сыр мулэстэ
Вытырдыяпэ накх ромнятэ.
Шукэ васта сыр э мулятэ.

И только откэрдэ якха
Ракирна вашо одова,
Со марлапэ инкэ ило
Дрэ ада трупю пашмуло.

Бавир дывэс ёй на ракирла,
Уса хай со-то дужакирла,
Хабэ дро муй ничи на лэла.
Екх о паны сырово пьела.

Шэро Калы пригаздыя,
Ёй тэ уштэл галёв камья.
Адай ла кашлэ замардя
И о шэро палэ пыя.

Паш латэ прэ шрандуны
Пашлы сыс капля ратуны.
Кирлэстыр рат бут выгыя
И дрэ пашрат Калы мыя.

Никон ясвин на прорадя,
Коли якха ёй закэрдя.
Адыкэ дрэ кралитка о бэрша
Сханэ о тэрнылэ сапа!

А лакэ бы и тэ дживэл.
Сыр цвэто бы тэ цвэтинэл.
Тэ бут жэ лакэ? Биш бэрша
Кицы ёйменькица хая!

И танго джиибэн тэрно.
Нэ сыс ёв сыр кирно шэло
Прэ лэстэ кон-то тырдя,
И джиибэн обрискирдя.

Розтасадэ о джиибэ.
Дрэ пхув калы ромня тходэ,
А лакэ трэби тэ дживэл
Сыр цвэто бы тэ цвэтинэл.

ЧИТАТЕЛИ!

Сообщите ваш отзыв об этой книге,
указав ваш возраст, профессию, где
работаете и адрес,

Государственному издательству
«художественная литература»
Массовый сектор

Москва, Центр, ул. 25 Октября
(бывш. Никольская), 10/2.

*Редактор А. Германов
Технический редактор М. Дементьев
Корректора М. Зевин и В. Покровская*

*

*Сдано в набор 27/XI 1935 г.
Подписано к печати 28/XII 1935 г.
Изд. № 1029. Зак. Инд Хн—51.
Формат 72×110¹/₃₂ 1 п. л.
по 39163 зн. в печ. л. авт. л. 1,7
Бумага Красновишерского бумкомбината
им. Менжинского*

*

*Уполн. Главлита Б—15474
Тираж 500.*

*

Цена 25 к.

17 ф-ка нац. книги ОГИЗ'а РСФСР треста «Полиграфкнига»
Москва, Шлюзовая наб., д. № 10.

Ц. 133
Авт № 75

THE
JOURNAL OF THE
AMERICAN MEDICAL ASSOCIATION

PUBLISHED WEEKLY
CHICAGO, ILL., U.S.A.

Цена 25 коп.


М2222

Цыг.


2-117

ОЛЬГА ПАНКОВА
РАЗДАВЛЕННАЯ ЖИЗНЬ

На цыганском языке



17



	Цыг.
2-117	